



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

აკლდამა



აკლდამა (ძვ. ებრ. *aqeldām* – „სისხლის ველი“; იმ ადგილის სახელწოდება, სადაც ძვ. იერუსალიმის სასაფლაო იყო), მიწისზედა ან ნაწილობრივ მიწისქვეშა (ზოგჯერ კლდეში ნაკვეთი) სამარხი ნაგებობა.

მცხეთის აკლდამა I ს.

იგივეა, რაც ძვ. ქართ. სამარხავი. ა. ერთი ან რამდენიმე მიცვალებულის, ჩვეულებრივ ერთი ოჯახის ან საგვარეულოს წარმომადგენელთა დასაკრძალავი იყო. ა. და ა-ის ტიპის სამარხი ნაგებობები (მავზოლეუმი, მასტაბა, პირამიდა, კრიპტა და სხვ.) გავრცელებულია მთელ მსოფლიოში. ცნობილია ძვ. ეგვ., ძვ. სპარს. და სხვ. კლდეში ნაკვეთი ა-ები, ეტრუსკების, მცირე აზიისა და ჩრდ. შავი ზღვისპირეთის ანტ. ხანის ა-ები. ა. ჩვეულებრივ ქვის კაპიტ. ნაგებობაა, ხშირად შიგნიდან შელესილი და მოხატული. მისი აგება მხოლოდ საგ-ბის არისტოკრ. ნაწილს შეეძლო. ქართლის ცხოვრების თანახმად, ა-ში იმარხებოდნენ ქართლის მეფეები (რევი, მირიანი...). საქართველოში აღმოჩენილია ქართლის სამეფოს მესვეურთა, წარჩინებულთა და მათი ოჯახის წევრთა მავზოლეუმის ტიპის ა-ები სამადლოში (ძვ. წ. III ს.), მცხეთაში (I ს., იხ. მცხეთის აკლდამა), ბაგინეთში (III ს.). ა-ები გათხარეს აგრეთვე წილკანში (IV – V სს.), ივრის სიონში (V–VIII სს.), ხორნაბუჯის მიდამოებში (V–VIII სს.), ჟინვალში (XI – XIII სს.) და სხვ. აღსანიშნავია ხევსურეთში სოფ. მუცოს ქვით ნაშენი ოთხკუთხა ა-ები; მათ შიდა კედლებზე ქვის თაროებია და ზედ ადამიანთა ჩონჩხები აწყვია. საყურადღებოა აგრეთვე ანატორის (სოფ. შატილთან) ა-ები. ხალხ. მეტყველებაში ა. უმთავრესად ქვით ან აგურით ნაგები სამარხია ერთი ან რამდენიმე მიცვალებულის დასაკრძალავად.

ლიტ.: თ ე დ ო რ ა ძ ე გ., ხუთი წელი ფშავ-ხევსურეთში, ტფ., 1930; მ ე ნ თ ე შ ა შ ვ ი ლ ი ს., მიცვალებულთა დამარხვისა და სამარეების ტერმინოლოგიისათვის, «საქართველოს სახელმწ. მუზეუმის მოამბე», 1944, 12 B; ჯ ა ვ ა ხ ი შ ვ ი ლ ი ივ., მასალები ქართველი ერის მატერიალური კულტურის ისტორიისათვის, [ტ.] 1 - მშენებლობის ხელოვნება ძველ საქართველოში, თბ., 1946; Л о м т ა თ ი დ з ე Г. А., Археологические раскопки в древнегрузинской столице Мцхета, Тб., 1955.

გ. ლომთათიძე

ი. გაგოშიძე
